



**Asa Nako Makaplagan Kini?
Unsa Ang Bili Niini?**

Unsa kaha ang imong tubag kon adunay mangutana kanimo niini nga pangutana: ***“Unsa nga usa ka butang ang imong pinakagusto kay sa bisan unsa pa niining kinabuhi-a?”*** Ang numero uno permi nga tubag mao ang ***“kalipay”***. Ang tanan nagtinguha gayod nga magmalipayon ug ang emosyon maoy makahimo sa matag usa nga mobati ug kahayahay. Kadaghanan sa katawhan andam gayod mobayad ug dakong kwarta aron lang malipay.

Si Elvis Presley, usa ka bantugan nga mag-aawit, sikat ug dato kaayo nga tawo, sa makausa gipangutana kon siya malipayon ba sa iyang kaadunahan ug kabantog. Siya miingon, “Dili! Ako ang pinakamasulob-ong tawo sa tibook kalibutan.” Si John D. Rockefeller, laing dato kaayo nga negosyante, usa ka bilyonaryo, gipangutana sa mao ra gihapon nga pangutana human niya naangkon ang iyang unang usa ka bilyon. Siya mitubag, “Akong na-angkon ang minilyon, apan wala sila magadala kanako ug kalipay.”

Kadaghanan sa atong gimbuhaton walay pulos nga nahisama sa 'narcotic' nga mopa-undang sa

kasakit sulod sa gitagana nga panahon lamang sa usa ka haw-ang nga kinabuhi. Kita mogasto bisan pa ug wala kitay igong kwarta aron sa pagpalit sa mga butang nga dili nato kaya sa katuyo-an nga modayeg kanato ang mga tawo nga wala nato kagustohi. Ang subo nga kamatuoran mao nga, dili igsapayan ug unsa ang anaa kanila o wala ba hinoon, ang dili malipayon nga mga tawo magadala sa ilang pagka-dili malipayon uban kanila bisan ug asa sila moadto.

Ang Bibliya nagsulti kanato nga si Jesus miingon,
“Malipayon kadtong mga naminaw sa Pulong sa Dios ug nagtuman niini.” (Lukas 11:28)

Siya miingon sa Juan 15:11,
“Kining mga butanga, Akong gisulti kaninyo aron nga ang Akong kalipay mamahimong ma-inyo, ug aron ang inyong kalipay pwedeng mamahimong hingpit.”

Ang Diosnong kalipay usa ka kalagnong kahimtang nga maila pinaagi sa pagkakontento ug katakus sa pagkinabuhi, gugma ug panalangin.

Usa ka inila pag-ayo ug tinahud nga ebanghelista nga si Billy Graham niingon, *“Kini mao ang kalipay nga nagdala ug pagkamalahutayong katakus sa pagkinabuhi. Dili kini ang taphaw lamang nga kalipay nga nagadepende lamang sa mga sirkumstansya, kondili sa kalipay ug katagbawan nga mopuno sa kalag, bisan pa taliwala sa pinakamasakit ug pinakapait nga kahimtangan.”*

Lingla ni Satanas nga ang mga tawo o mga panghitabo makahimo kanimo nga malipayon. Kining mao nga bakak nahisama sa panglipat sa mata taliwala sa mainit ug uga nga disyerto. Ang giinitan pag-ayo ug gikapoy nga biyahero, nakakita ug maanindot ug bugnaw nga tubod sa tubig, apan kini usa lamang diay ka limbong sa mata tungod sa kalibog ug nawad-an sa paglaum nga panghunahuna. Kini mao ang kalipay nga gitanyag sa kalibutan. Kita naninguha pag-ayo niini apan wala gayod kita makaangkon niini. Nagsige hinoon kini ug likay-likay kanato bisan pa sa tanan natong mga paningkamot.

Ang Dios nagatagana daan kanimo nga malipayon, apan dili halayo gikan Kaniya. Siya

ang imong magbubuhay ug langitnong Amahan, apan ang imong mga sala maoy nakapahimulag kanimo gikan Kaniya.

Ang Bibliya nagasulti,

“Walay si bisan kinsa nga nagabuhay sa maayo, wala ni bisan usa.” (Roma 3:12b)

Mao kini ang problema nga Siya lamang ang makasulbad, ug Iya na nga nasulbad!

Atong makita ang kasulbaran sa Juan 3:16,

“Ang Dios nahigugma pag-ayo sa kalibutan (katawhan), nga Iyang gihatag ang Iyang bugtong Anak, nga si kinsa kadtong motoo Kaniya dili gayod malaglag, kondili makabaton sa kinabuhing dayon.”

Pinaagi sa milagro sa ulay nga pagpakatawo ug ang pagkinabuhi nga hingpit walay sala, si Jesu-Cristo takos gayod sa pagtagbaw sa hingpit nga pagkamatarong sa Balaang Dios kinsa nagkinahanglan sa bug-os ug hingpit nga bayad sa sala. Si Jesu-Cristo, ang Kordero sa Dios, walay buling o mansa, ning-adto sa krus isip puli kanato

ug didto Siya gihukman tungod sa atong mga sala, ug dili lamang para sa ato ra, kondili sa tanang mga sala sa matag usa sa tibook kalibutan. Siya lamang ang bugtong makatagbaw sa hustisya sa Dios, ug Iyang nabuhat kini pinaagi sa Iyang kamatayon, paglubong ug pagkabanhaw. Iyang gibayran kining tanan tungod kay Siya nahigugma kanato!

Si Jesus miingon,

“Kini maoy buhat sa Dios, nga ikaw motoo lamang Kaniya kinsa Iyang gipadala.”

(Juan 6:29)

Ningtoo ka ba ni Cristo nga imong Manluluwas? Kon wala pa, sa yano lamang sultihi ang Dios nga Amahan, diha sa imong kaugalingon nga hunahuna, nga ikaw mitoo sa Iyang Anak, ug dihaduha ang imong kaluwasan. Pinaagi lamang sa yanong pagtoo ikaw makaangkon sa pinakabililhong gasa, ang gasa nga kinabuhing dayon.

Si Jesus nag-ingon sa Juan 10:10b,

“Ako ning-anhi aron nga sila (kini

nagkahulugan ikaw ug ako) unta makabaton ug kinabuhi, ug unta mabatonan kini nga puno sa kabuhong.”

Ang gasa nga kinabuhing dayon mao ang pinakabilihong gasa sa kalibutan ug kini kanunay nga anaa bisan unsang orasa. Si John D. Rockefeller ningtoo ni Cristo sa iyang edad nga 53, samtang nagahigda sa katre sa hospital himatyon diha sa walay kaayohan nga sakit. Siya naayo ug nagpakabuhi hangtud pa sa iyang pagkanobenta ug karon atua sa langit, dato ug malipayon kaayo. Ang GRASYA sa Dios mao ang usa ka Diosnong bahandi tungod sa gibuhay ni Cristo. Ang Hebreohanon 12:2b nagsulti kanato sa pagpunting sa atong mga mata ngadto lamang kang Jesus, *“kinsa nga ang kalipay gitagana Kaniya, ning-antus sa krus.”* – Siya ning-antus niini tungod kay Siya nahigugma kanato! Ang tinuod nga kalipay mao ang kalipay sa paghibalo ni Jesu-Cristo ug ang kapasayloan sa sala. Pinaagi sa pagpuyo sa pagkinabuhi diha ni Cristo atong matagamtaman ang pinakadako nga kalipay dinhi sa kalibutan ug ingon man sa eternidad. Si Cristo nag-ingon nga kita *“Iyang kalipay.”* Imo ba Siya?

Translated from the tract "Happiness" by

Rick Hughes

P.O. Box 100 • Cropwell, AL 35054